

Napparsimasut Maalaarutaannik Aalajangiisartunut maalaaruteqartarneq pillugu Namminersorlutik Oqartussat nalunaarutaat

Peqqinnissaqarfiup aqunneqarnera, aaqqissuussaanera kiisalu peqqinnissamut tunngasutigut sullisisut aamma tarnip pissusaanik ilisimasallit pillugit Inatsisartut Inatsisaat nr. 27, novembarip 18-ani 2010-meersoq § 11a Inatsisartut Inatsisaanni nr. 2-mi maajip 29-ni 2012-imeersumi allannguiteqartinneqartoq naapertorlugu, aalajangersarneqarpoq:

Atuuffissaa

§ 1. Kalaallit Nunaanni ilinniarsimassuseq tunuliaqutaralugu peqqinnissakkut sullisisut pillugit napparsimasut maalaarutaat Qallunaat Nunaanni Napparsimasut Maalaarutaannik Aalajangiisartunut saqqummiunneqassapput.

Stk. 2. Nunatsinni Nakorsaanerup Kalaallit Nunaanni ilinniagaqassuseq tunuliaqutaralugu peqqinnissakkut sullisisut sulinerat pillugu isornartorsiuniissaq, allatulluunniit kinguneqartitsinissaq tunngavissaqarsorinarpas, suliat Napparsimasut Maalaarutaannik Aalajangiisartunut saqqummiussinnaavaa.

§ 2. Kalaallit Nunaanni peqqinnissakkut sullisisut Napparsimasut Maalaarutaannik Aalajangiisartut suliassaqarfinut ilaasut tassaapput:

1) Peqqinnissakkut sullisisut ilinniagaqassuseq tunuliaqutaralugu qallunaat sulisinnaatitaanermut akuersissutaannik pigisallit taakkununnga ilaallutik nakorsat, kigutit nakorsaat, kiropraktorit, ernisussiortut, pillorissaasut, timimik sungiusaasut, aviaasartut. nappaatillit nerisaqarnerannut siunnersortit, qinnguartaasartut, timikkut innarluutilinnut iluaquusersuusiortut, kigutaasiortut, kigutigissaasut, isarualerisut, isarussianut taarsiullugit atortakkanik igalaasartaasalerisut isarualerisutullu ilinniartitaaneq nutaaq naapertorlugu ilinniarsimasut, isigalerisut kiisalu isumaginninnermi peqqissaanermilu assistentit.

2) Tarnip pissusaanik immikkut ilisimasallit peqqinnissaqarfimmi suliffeqartut, tarnikkut nappaatilinnik sullisisut (plejer), napparsimasunik paaqqinnittut, illuni paaqqinniffinni assentit, nakorsaatilerisut, nakorsasiornermik immikkut ilisimasallit nakorsataasivimmi sulifillit, nakorsataasivimmi siunnersortit nakorsasiornermillu immikkut ilisimasalittut ilinniartut ilinniernerminnut atatillugu nakorsataasivimmiiissimasut.

3) Kigutit nakorsaasa namminersortut peqqinnissakkut sullissinerat.

4) Peqqissaasut, kigutigissaasut, klinikassistentit, peqqinnissamik siammarsaasut, sundhedsassistentit,

inunniq isumaginninnermi peqqissaanermilu ikiortit, nunaqarfinni peqqinnissakkut sullisisut, peqqissaanermi ikiortit, portørítullu annaassiniartartut Kalaallit Nunaanni ilinniarsimaneq sulisinnaatitaanerluunniit tunngavigalugu peqqinnissakkut sullisisut.

§ 3. Peqqinnissakkut sullissineq maalaarutaasoq Kalaallit Nunaanni peqqinnissaqarfimmit nakorsartinnissamik pisariaqartitsisunik misissuinerunngippat nakorsartinnissamullu innersuussinerunngippat, Pituffiup sakkutooqarfiani peqqinnissakkut sullisisunut, Nalunaarut atuutinngilaq.

Maalaarutinik piareersaasarneq

§ 4. Napparsimasut Maalaarutaannik Aalajangiisartunut maalaarut, Nunatsinni Nakorsaanermut tunniunneqassaaq. Nunatsinni Nakorsaanerup maalaarut suliassanngortissavaa Napparsimasullu Maalaarutaannik Aalajangiisartunut ingerlateqqillugu.

Imm. 2. Tamatuma kingorna peqqinnissakkut sullisisumit, maalaaruteqartumit maalaarutigineqartumillu, allattugaatinik oqaaseqaatinillu Nunatsinni Nakorsaaneq pissarsiniassaaq. Nunatsinni Nakorsaaneq Kalaallit Nunaanni pissutsinik atugassarititaasunillu, maalaarummut pineqartumut naliliinissami pingaarutilittut isigisariaqakkanik nassuaatitalimmik, suliamut tunngatillugu saqqummiussissaaq.

Imm. 3. Nunatsinni Nakorsaanerup suliamut tunngatillugu saqqummiussaa, naliliinera maalaarutillu aalajangiiviginissaanut innersuussutaa, Napparsimasut Maalaarutaannik Aalajangiisartut suliamik nangitsinerminni atugassaattut nassiunneqassaaq.

§ 5. Napparsimasut Maalaarutaannik Aalajangiisartut maalaarummut aalajangiinnginneranni, Peqqissutsimut Naalakkersuisoqarfik, Nunatsinni Nakorsaaneq, maalaaruteqartoq peqqinnissakkullu sullisisut maalaarutigineqartut, aalajangiinissamut siunnersuut immikkullu ilisimasallit naliliinerat aalajangiinermut tunngaviusoq ilanngullugu, tusarniaavagineqassapput.

§ 6. Nunatsinni Nakorsaaneq maalaarutit qallunaatut kalaallisullu nutserneqarnissaannut Napparsimasut Maalaarutaannik Aalajangiisartunut ikuutissaaq aningaasartuutitaalu akilissallugit.

Maalaarutinik tamanut saqqummiussineq

§ 7. Napparsimasut Maalaarutaannik Aalajangiisartut aalajangigaat Nunatsinni Nakorsaanerup ukiumoortumik nalunaarusiaani naalisarlugit issuaavagineqartarput. Peqqinnissakkut sullisisoq maalaaruteqartoq pillugu paassisutissat ilisarnarunnaarsarneqartarput.

Maalaaruteqarsinnaanermut piffissatut killiliussat

§ 8. § 1 imm. 1 naapertorlugu maalaarut, pisimasup maalaarutiginiakkap ilisimalerneraniit imaluunniit ilisimalersimasariaqarfianiit ukiut marluk qaangiutsinnagit Napparsimasut Maalaarutaannik Aalajangiisartunut imal. Nunatsinni Nakorsaanermut tunniunneqassaaq. Pisimasulli maalaarutiginiakkap kingorna kingusinnerpaamik ukiut tallimat qaangiunneranni maalaarut tunniunneqassaaq.

Atuutilerfia

§ 9. Nalunaarut oktobarip aallaqqaataani atuutilissaaq

*Imm. 2. Peqqinnissakkut sullinneqarneq pillugu maalaarutit Napparsimasut Maalaarutaannik
Aalajangiisartunit naammassineqassapput.*

Namminersorlutik Oqartussat ulloq: 24. september 2012

Agathe Fontain

/

Ann Birkekær Kjeldsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut